



REPUBLIKA E SHQIPËRISË
AVOKATI I POPULLIT

**Mekanizmi Kombëtar për Parandalimin e Torturës
trajtimin ose dënimit të egër, çnjerëzor ose poshtërues**

Adresa: Bulevardi: "Zhan D'Ark" Nr.2
Tiranë, Shqipëri

Tel/Fax: +355 4 2380 300/343
E-mail: ap@avokatipopullit.gov.al
ee.avokatipopullit.gov.al

Nr. K4/I52-2 Prot.
Nr. Dok. 202503002/2

Tiranë _27_/_08_/2025

Lënda: *Rekomandime për inspektimin e bërë në Komisaratin e Policisë Fier.*

Drejtuar: **Z. Gentian ALI**
Shef i Komisaratin të Policisë

FIER

Drejtuar: **Z. Skender HITA**
Drejtor i Drejtorisë Vendore të Policisë

FIER

Për dijeni: **Drejtues Madhor Ilir PRODA**
Drejtor i Përgjithshëm i Policisë të Shtetit

TIRANË

Të nderuar,

Duke ju falenderuar për bashkëpunimin e deritanishëm midis institucioneve tona, si dhe duke vlerësuar angazhimin për punën e stafit të institucionit që ju drejtoni, në vijim po ju njohim me gjetjet dhe rekomandimet nga inspektimi i kryer në ambientet e privimit të lirisë së personit në Drejtorinë/Komisariatit të Policisë Fier nga Institucioni i Avokatit të Popullit.

Avokati i Popullit, në rolin e Mekanizmit Kombëtar për Parandalimin e Torturës, Trajtimin ose Dënimit të egër, çnjerëzor ose poshtërues (MKPT), në vijim Mekanizmi Kombëtar, seksion pranë Avokatit të Popullit, bazuar në nenin 19/1 të ligjit nr. 8454, datë 04.02.1999 "Për Avokatin e Popullit", i ndryshuar, dhe nenin 81 të ligjit nr.81/2020 "Për të drejtat dhe trajtimin e të dënuarve me burgim dhe të paraburgosurve", kreu një inspektim në ambientet e privimit të lirisë së personit në Drejtorinë/Komisariatit të Policisë Fier.

Inspektimi u krye në datën 04.07.2025, sipas Planit të Inspektimit të miratuar nga Avokati i Popullit. Grupi i inspektimit përbëhej z. Vullnet Topalli dhe z. Hazbi Selita me detyrë Nd/komisionerë pranë Mekanizmit Kombëtar.

MKPT, bazuar në legjislacionin vendas dhe atë ndërkombëtar, mund të vizitojë në çdo kohë dhe pa paralajmërim, të gjitha vendet ku mbahen personat e privuar nga liria, përfshirë organet e policisë në nivel vendor, burgjet, qendrat e pritjes provizore të emigrantëve të parregullt,

qendrat ku mbahen shtetasit e huaj të privuar nga liria, azilkërkuesit, institucionet psikiatrike dhe shtëpitë e të moshuarve. Inspektimi ishte i paparalajmeruar.

Qëllimi i inspektimit ishte vlerësimi i përgjithshëm i respektimit të të drejtave themelore të të arrestuarve, të ndaluarve dhe të shoqëruarve, të cilat ju garantohen në Kushtetutën e Republikës së Shqipërisë, Kodin e Procedurës Penale, ligjin nr. 82/2024 *“Për Policinë e Shtetit”*, si dhe me standardet ndërkombëtare për mbrojtjen e të drejtave themelore të personave të privuar nga liria.

Gjithashtu, u verifikuan procedurat që ndjekin punonjësit e policisë në zbatim të Urdhrit të Drejtorit të Përgjithshëm të Policisë së Shtetit nr .1720, datë 20.11.2023 për miratimin e procedurës standarde *“Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”*, si dhe Urdhrit të Drejtorit të Përgjithshëm të Policisë së Shtetit nr .894, datë 19.07.2022 për miratimin e procedurës standarde të punës *“Rregullat për trajtimin e shtetasve që shoqërohen në Mjediset e Policisë”*.

Institucioni i Avokatit të Popullit, pasi u njoh me konstatimet e grupit inspektues të MKPT-së dhe nivelin e zbatimit të rekomandimeve të lëna nga inspektimi i mëparshëm, ka detyrimin ligjor t’ju parashtojë konkluzionet përfundimtare, të referuara si më poshtë vijon:

Shënime të përgjithshme

Në përputhje me metodologjinë e zhvillimit të inspektimit në institucionet ku mbahen e trajtohen shtetasit e privuar nga liria, në mungesë të drejtorit të policisë dhe shefit të komisarariatit, u takua me Shefin e Sektorit të Krimeve në Komisariatin e Policisë Fier z. Anest Salaj, i cili u vu në dijeni lidhur me qëllimin e inspektimit.

Z. Salaj, informoi grupin e inspektimit mbi gjendjen e kushtet, në të cilat ndodhet ambienti i shoqërimit dhe i sigurisë në këtë komisarjat dhe informoi për masat e marra për plotësimin e rekomandimeve të Institucionit të Avokatit të Popullit nga inspektimi i vitit të kaluar¹, në lidhje me përmirësimin e disa kushteve sipas normave dhe standardeve, për qëndrimin dhe trajtimin e personave të shoqëruar dhe të ndaluar/arrestuar, sipas përcaktimeve të bëra në aktet ndërkombëtare dhe në aktet ligjore e nënligjore në fuqi.

Grupi i inspektimit pasi mori informacionin e nevojshëm, vijoi me inspektimin e ambientit të shoqërimit dhe atij të sigurisë, për evidentimin e kushteve në të cilat janë ndërtuar dhomat e shoqërimit dhe dhomat e sigurisë, plotësimin e kriterëve për ndërtimin e dhomave dhe rregullat që zbatohen nga personeli i shërbimit policor për respektimin dhe garantimin e të drejtave kushtetuese dhe ligjore të personave të privuar nga liria.

Gjithashtu, grupi i inspektimit vizitoi edhe zyrat e specialistëve e ndihmës specialistëve të policisë, që kryejnë veprime procedurale me personat e shoqëruar dhe personat e ndaluar/arrestuar, si dhe kontrolloi e administroi dokumentacionin përkatës ku pasqyrohen veprimet e kryera me këta persona.

Nisur nga informacioni i drejtuesve të policisë, por dhe nga inspektimi i kryer në mjediset e sigurisë dhe të shoqërimit në këtë Drejtori, rezultoi se respektimi i të drejtave të personave të

¹ Shkresë Nr .K4/I32-2, Prot., datë 31.07.2024 *“Rekomandime për inspektimin e kryer në Komisariatin e Policisë Fier”*.

privuar nga liria dhe kushtet infrastrukturore në ambientin e shoqërimit dhe të sigurisë, në tërësi ishin sipas kritereve, normave dhe parametrave teknikë të parashikuara në procedurat standarde, që garantojnë sigurinë dhe trajtimin e këtyre personave.

Nga informacioni dhe verifikimi i rekomandimeve të Institucionit të Avokatit të Popullit të dërguara në përfundim të inspektimit të kryer në vitin 2024², rezulton se:

1. Ishte zbatuar rekomandimi për plotësimin me korrektësi të *“Formularit të Raportit të Shoqërimit”* nga punonjësi i policisë që ka kryer shoqërimit e personit, në zbatim të rregullave të përcaktuara në procedurat standarde të punës *“Rregullat për trajtimin e shtetasve që shoqërohen në mjediset e policisë”*, miratuar me Urdhrin nr. 894, datë 19.07.2022 të Drejtorit të Përgjithshëm të Policisë së Shtetit.
2. Ishte zbatuar rekomandimi, për pajisjen me një regjistër të posaçëm, vetëm për të miturit në konflikt me ligjin në ambientet e dhomave sigurisë të Drejtorisë Vendore të Policisë Fier.
3. Ishte zbatuar rekomandimi për plotësimin me korrektësi të rubrikës *“Të dhëna për njoftimin e familjarëve/afërmve”* në *“Regjistrin e personave të shoqëruar”* dhe evidentimi i tyre në këtë regjistër sipas kërkesave të parashikuara në procedurat standarde *“Rregullat teknike të shoqërimit në mjediset e Policisë së Shtetit”*, miratuar me Urdhrin e Drejtorit të Përgjithshëm të Policisë së Shtetit nr .894, datë 19.07.2022 dhe sigurimin e monitorimit të vazhdueshëm të tyre si dhe nisjen e procedurave për evidentimin e përgjegjësve në lidhje me këtë çështje.
4. Ishte zbatuar rekomandimi për vendosjen e posterave me të drejtat e personave të shoqëruar/ndaluar brenda dhomave të shoqërimit.
5. Ishte zbatuar rekomandimi, për vënien në funksion të ambientit të dusheve për dhomat e sigurisë në këtë komisariat.

Ndërkohë, grupi i inspektimit konstatoi se:

1. Nuk ishte zbatuar rekomandimi, për gjetjen e fondeve për riparimin e dritareve të dhomave të shoqërimit në Komisaratin e Policisë Fier, sipas kritereve të parashikuara në Kreun VI, pika 4 të procedurave standarde *“Rregullat për trajtimin e shtetasve që shoqërohen në mjediset e policisë”*, miratuar me Urdhrin nr. 894, datë 19.07.2022 të Drejtorit të Përgjithshëm të Policisë së Shtetit.
2. Nuk ishte zbatuar rekomandimi për ndërtimin e murit rrethues të tualeteve në dhomat e sigurisë sipas parashikimeve kreu VIII pika 4.3/b, në Urdhrin e Drejtorit të Përgjithshëm të Policisë së Shtetit nr.1720, datë 20.11.2023, për miratimin e procedurave standarde *Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”*.
3. Nuk ishte zbatuar rekomandimi Marrjen e masave për vendosjen e tavolinave në dhomat e shoqërimit sipas parashikimeve në Urdhrin e Drejtorit të Përgjithshëm të Policisë së Shtetit nr.894, datë 19.07.2022, për miratimin e procedurave standarde *“Rregullat për trajtimin e shtetasve që shoqërohen në mjediset e policisë”*.
4. Nuk ishte zbatuar rekomandimi, për instalimin e sistemit të monitorimit me kamera vëzhguese në ambientet e dhomave të shoqërimit në Komisaratin e Policisë Fier.
5. Nuk ishte zbatuar rekomandimi, për krijimin e një ambienti të përshtatshëm për intervistimin/marrjen në pyetje të shtetasve, gjatë kryerjes së veprimeve procedurale nga

² Kthim përgjigje të rekomandimit tonë me numër 7501/1 prot, datë 30.10.2024 nga Drejtoria e Përgjithshme të Policisë së Shtetit.

specialistët dhe punonjësit e policisë në këtë institucion, si dhe të ndërpritet praktika e marrjes në pyetje të personave të shoqëruar në zyrat e punës të punonjësve të policisë të komisariatit.

- 6 Nuk ishte zbatuar rekomandimi për emërimin e mjekut me kohë të plotë në Drejtorinë Vendore të Policisë Fier, për kryerjen e vizitave mjekësore të personave të arrestuar/ndaluar, brenda 12 orëve të vendosjes të këtyre personave në ambientin e sigurisë.
- 7 Nuk ishte zbatuar rekomandimi për krijimin e dhomës së mjekut brenda ambienteve të dhomave të sigurisë në Komisaratin e Policisë Fier.
- 8 Nuk ishte zbatuar rekomandimi për krijimin e ambienteve të ajrimit për personat në dhomat e sigurisë.
- 9 Nuk ishte zbatuar rekomandimi për vënien në funksion të kaldajës për mundësimin e ngrohjes të personave të arrestuar, për periudhën e dimrit në ambientin e dhomave të sigurisë në këtë komisariat.
- 10 Nuk ishte zbatuar rekomandimi, për afishimin në ambientet e dhomave të shoqërimit, të listës të përditësuar me avokatë mbrojtës të miratuar nga Dhoma Kombëtare e Avokatisë dhe organi i prokurorisë, me qëllim sigurimin e avokatëve kryesisht që nga momenti i privimit të lirisë të personit, në rastin kur i shoqëruari/ndaluar/arrestuari nuk ka mundësi financiare të mbrohet me avokat kryesisht.
- 11 Nuk ishte zbatuar rekomandimi për afishimin në ambientin e shoqërimit dhe në zyrën e informacionit të komisariatit, të listës së psikologëve të miratuar nga Urdhri i Psikologut, Tiranë.
- 12 Nuk ishte zbatuar rekomandimi, për dhënien e kartës së të drejtave në formë shkresore personave të shoqëruar apo ndaluar që në momentin e hyrjes së tyre në komisariat.
- 13 Nuk ishin marrë masa për trajnimin e punonjësve të policisë që janë përgjegjës për persona të shoqëruar, ndaluar/arrestuar në konflikt me ligjin si dhe njohja me Urdhrin e Drejtorit të Përgjithshëm të Policisë së Shtetit nr .1720, datë 20.11.2023 për miratimin e procedurave standarde *“Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”*, si dhe urdhrin nr .894, datë 19.07.2022 për miratimin e procedurave standarde të punës *“Rregullat për trajtimin e shtetasve që shoqërohen në Mjedise e Policisë”*

Avokati i Popullit është i ndërgjegjshëm se disa rekomandime kërkojnë ndërhyrje infrastrukturore dhe buxhetore që nuk varen nga njësia vendore, por çdo komisariat duhet të demostrojë se ka qenë konsekuent në kërkimin e fondeve, njëkohësisht vërejmë me keqardhje se disa të tjera lidhen me qasjen bashkëpunuese të drejtuesve ndaj rekomandimeve, ndonëse të pranuar dhe të përsëritura disa herë nga ana jonë.

Institucioni i Avokatit të Popullit, pasi u njoh me konstatimet e grupit të inspektimit, ka detyrimin ligjor t’ju parashtrojë gjetjet e këtij inspektimi, si më poshtë vijon:

Ambientet e shoqërimit dhe kushtet e tyre

Ambienti i shoqërimit në Komisaratin e Policisë Fier, ishte i ndërtuar pjesërisht sipas kushteve dhe kriterëve të përcaktuara në ligjin nr .82/2024 *“Për Policinë e Shtetit”*, dhe procedurave standarde *“Rregullat për trajtimin e shtetasve që shoqërohen në mjediset e policisë”* miratuar me Urdhrin nr . 894, datë 19.07.2022 të Drejtorit të Përgjithshëm të Policisë së Shtetit.

Ambienti i shoqërimit ndodhej në godinë më vete, brenda territorit të komisariatit dhe përbëhej nga tre dhoma shoqërimi të ndërtuara për persona të rritur, gra dhe për të miturit³.

Dhomat e shoqërimit ishin me sipërfaqe dhe hapësirë të bollshme për qëndrimin dhe trajtimin e të shoqëruarve. Ato ishin të pajisura secila me 3 karrige të fiksuara në dysheme, që mundësonin qëndrimin ulur të personave të shoqëruar, si dhe ishin të pastra nga ana higjienosanitare, por mungonin tavolina për qëndrimin e personave në konflikt me ligjin në këto ambiente. Të 3 dhomat e shoqërimit kishin tualete brenda, të pajisura me çezmë, që kishte ujë të rrjedhshëm pa ndërprerje. Përmasat e dhomës së shoqërimit ishin 4x4 m², me kapacitet deri në 12 persona të shoqëruar.

Dritaret e dhomave të shoqërimit janë me përmasa të tilla, që mundësojnë ajrim dhe ndriçim natyral të plotë. Në pjesën e jashtme, ato janë të siguruara me skarë me qëllim sigurimin e personave të shoqëruar, por mungonte kanata e dritares në njërin nga dhomat, e cila ishte vetëm me skarë hekuri. Ndërsa të tjerat ishin me kanata por kishin xhamat e thyer, duke mos garantuar standardin e Urdhrit të Drejtorit të Përgjithshëm të Policisë së Shtetit nr . 894, datë 19.07.2022 procedurat standarde *“Rregullat për trajtimin e shtetasve që shoqërohen në mjediset e policisë”*, ku parashikohet se: *“Dritaret e dhomave të shoqërimit të jenë me përmasa jo më pak se 1.5 x 1.2 m”, dhe nga ana e jashtme e dritareve të jetë e vendosur një zgarë hekuri me shufra vertikale dhe horizontale me trashësi/seksion 18 mm dhe me kuadrate 15 x15 cm, të fiksuara në faqen anësore të dritares. Dritaret duhet të jenë me material duralumin dhe dopjo xham⁴”*. Ambientet e shoqërimit nuk kishin sistem ngrohjeje/ftohjeje.

Dhomat e shoqërimit kanë ndriçim artificial që furnizohet nga rrjeti elektrik, si dhe gjenerator që shërben si burim rezervë në rast ndërprerje të energjisë elektrike. Dyert e dhomave të shoqërimit mbyllesh me çelës dhe kanë bravë të rregullt.

Në koridoret e dhomave të shoqërimit ishin të instaluar 2 kamera për mbajtjen në vëzhgim të këtij ambienti, por ato mungonin brenda dhomave të shoqërimit për monitorimin e personave të shoqëruar në këtë insitucion. Instalimi i sistemit të kamerave të sigurisë brenda dhomave të shoqërimit do të shërbejë për mbajtjen në vëzhgim të korridorit dhe dhomave të shoqërimit, si dhe do të monitorojë veprimet që kryejnë punonjësit e policisë me personat e shoqëruar gjatë kryerjes së procedurave që nga hyrja në mjediset e policisë, qëndrimin në dhoma, si dhe gjatë marrjes në pyetje të tyre.

Në kushtet e vendodhjes së komisariatit, si dhe për të garantuar sigurinë e personave të shoqëruar, është i domosdoshëm instalimi i sistemit të kamerave në ambientet e brendshme të dhomave të shoqërimit siç parashikon Urdhri i Drejtorit të Përgjithshëm të Policisë së Shtetit nr. 894, datë 19.07.2022 procedurat standarde *“Rregullat për trajtimin e shtetasve që shoqërohen në mjediset e policisë”*, ku thuhet se: *“Të gjitha ambientet e shoqërimit monitorohen me sisteme të kamerave (përfshirë tualetin) si ambientet e brendshme të dhomave të shoqërimit, korridorit të tyre dhe pjesën e jashtme të dhomave të shoqërimit, të cilat lidhen dhe trasmentojnë pamje/imazhe në monitor të vendosur në ambientin e shoqërimit të sallës së komandimit/shërbimit të informacionit DPV komisaritate, stacione policie”*, konstatim i përsëritur edhe nga inspektimi i mëparshëm nga Institucioni i Avokatit të Popullit.

³ Kreu VII, pika 4/d e procedurave standarde *“Rregullat për trajtimin e shtetasve që shoqërohen në mjediset e policisë”*.

⁴ Kreu V1 pika 4 gërma e.8, e.9 e procedurave standarde të punës *“Rregullat teknike të shoqërimit në mjediset e Policisë së Shtetit”*, miratuar me Urdhrin e Drejtorit të Përgjithshëm të Policisë së Shtetit nr.894, datë 19.07.2022.

Në ambientin e shoqërimit në korridor, ishin vendosur postera me të drejtat ligjore të personave të shoqëruar. Gjithashtu, në posterat përkatës ishte pasqyruar edhe e drejta ligjore e personave të shoqëruar për të paraqitur ankesa.

Në Komisarariat e Policisë Fier, gjatë periudhës 01.01.2025 deri më 04.07.2025 ishin të shoqëruar, të ndaluar apo të arrestuar dhe të evidentuar në regjistrin e shoqërimit **725** persona, ku konkretisht 703 persona ishin shtetas madhorë burra, 13 shtetase gra dhe 9 shtetas të mitur në konflikt me ligjin, sipas përcaktimeve të bëra në nenin 19 dhe 25/1 të ligjit nr. 82/2024 “Për Policinë e Shtetit”. Në momentin e inspektimit, nuk kishte asnjë shtetas të shoqëruar në dhomat e shoqërimit.

Nga inspektimi i ambientit të shoqërimit u konstatua se, mungonte dhoma e veçantë për marrjen në pyetje/intervistimin e personave të shoqëruar, e cila duhet të jetë e pajisur me tavolina, karrige dhe stola për qëndrimin ulur të shtetasve të shoqëruar, si dhe me orenditë e nevojshme si karrige dhe tavolina pune për specialistët e policisë⁵, por sipas informacionit të Shefit të Krimeve, të shoqëruarit merren në pyetje në zyrat e punës të punonjësve të policisë.

Gjithashtu, përgjatë inspektimit konstatuam se personave të shoqëruar nga policia nuk ju jepej informacioni për të drejtat e tyre në formë shkresore, që nga fillimi i privimit të lirisë, për të siguruar informim të qartë në lidhje me të drejtat ligjore e procedurale që ata kanë. Mekanizmi Kombëtar për Parandalimin e Torturës sugjeron dhënien e kartës të drejtave që në momentin e hyrjes në komisarariat⁶. Rekomandimi i Komitetit për Parandalimin e Torturës (CPT-së), në përmbajtjen e tij nënkupton që karta me të drejtat që gëzojnë personat kur hyjnë në mjediset e policisë, duhet tu jepet edhe personave që mbahen në dhomat e shoqërimit, pra që në momentet e para të privimit të lirisë, Pasi këtyre personave ju kufizohet liria deri në 5 orë (maksimumi) qëndrimi në dhomat e shoqërimit, ata merren në pyetje nga specialistët e policisë dhe kanë të drejtën për njoftimin e familjarëve të tyre, të drejtën për qasje me avokat mbrojtës, etj. Aktualisht, karta me të drejtat jepet vetëm në momentin kur i ndaluar/arrestuari merret në pyetje nga OPGJ dhe hyn në dhomat e sigurisë.

Në strukturën organike të Komisarariatit të Policisë Fier janë 8 specialistë policie, që kryejnë funksionin e OPGJ-së për rastet e hetimit të veprave të rënda penale dhe njëkohësisht ata kryejnë veprimet procedurale të marrjes në pyetje të personave të shoqëruar, të arrestuar apo të ndaluar. Në këtë institucion kishte 7 zyra pune të OPGJ-ve dhe nga inspektimi i këtyre zyrave, nuk u gjendën sende apo mjete që ekspozojnë dhunë te personat e shoqëruar gjatë intervistimit apo marrjes në pyetje të tyre.

Gjithashtu, në katin e parë të Komisarariatit të Policisë Fier, ndodhej një dhomë e cila shërbente si zyrë pune për Specialistin e Policisë së Zonës (SPZ). Ky ambient ishte i pajisur me tavolinë, karrige dhe stola për qëndrimin ulur të shtetasve të shoqëruar, si dhe me orenditë e nevojshme si karrige dhe tavolina pune për specialistët e policisë, por nuk kishte të instaluar kamerat e monitorimit⁷.

⁵ Kreu VI, Pika 3/d e procedurave standarde “Rregullat për trajtimin e shtetasve që shoqërohen në mjediset e policisë” miratuar me Urdhrin Nr.894, datë 19.07.2022 të Drejtorit të Përgjithshëm të Policisë së Shtetit.

⁶ Raporti i Komitetit Europian për Parandalimin e Torturës dhe Trajtimin Çnjerëzor dhe Degradues (KPT), gjatë vizitës së tyre në Shqipëri në datat 20 - 30 Nëntor 2018.

⁷ Kreu VI, Pika 4/g e procedurave standarde “Rregullat për trajtimin e shtetasve që shoqërohen në mjediset e policisë”, miratuar me Urdhrin nr . 894, datë 19.07.2022 të Drejtorit të Përgjithshëm të Policisë së Shtetit.

Në Komisarlatin e Policisë Fier, në katin e dytë të institucionit ishte një dhomë e mbajtjes së provave materiale dhe sipas informacionit të drejtuesve të komisarlatit provat materiale futen në një qese të etiketuar në këtë ambient.

Gjatë inspektimit u evidentuan disa praktika, nga ku rezultoi se në përfundim të procedurave dhe veprimeve të kryera nga punonjësit e policisë në Komisarlatin e Policisë Fier, mbahej procesverbali përkatës dhe pasi firmosej, një kopje i jepej personit të shoqëruar dhe një kopje ruhej në arkivën e institucionit.

Ambientet e sigurisë/kushtet e tyre dhe trajtimi i të ndaluarve/arrestuarve

Dhomat e sigurisë në Komisarlatin e Policisë Fier ishin **pjesërisht** të ndërtuara, sipas kërkesave të parashikuara në ligjin nr .82/2024 “Për Policinë e Shtetit”, dhe procedurat standarde “*Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre*”, miratuar me Urdhrin nr .1720, datë 20.11.2023 të Drejtorit të Përgjithshëm të Policisë së Shtetit.

Ambientet e sigurisë përbëheshin nga 6 dhoma sigurie me kapacitet zyrtar për 8 persona, konkretisht 4 (katër) dhoma me nga 1 (një) person secila, ndërsa 2 (dy) dhoma të tjera me 2 persona, të ndara në dhoma për të rritur burra, në dhoma për femra dhe në dhoma për të mitur, sipas kërkesës së ligjit nr .82/2024 “Për Policinë e Shtetit” dhe aktit të procedurave standarde “*Trajtimi dhe sigurimi i personave të arrestuar/ ndaluar në ambientet e Policisë së Shtetit, evidentimi dhe zgjidhja e kërkesave të tyre*”, miratuar me Urdhrin nr .1720, datë 20.11.2023, të Drejtorit të Përgjithshëm të Policisë së Shtetit. Në momentin e inspektimit, në dhomat e sigurisë ndodheshin 3 (tre) persona, në cilësinë e të arrestuarit dhe të ndaluarit.

Ambientet e dhomave të sigurisë ndahen në dy pjesë, në ambientin për jetesë, si dhe në paradhomën që shërbente për qëndrimin e personave në orare të caktuara dhe për pastrim vetjak, pasi ndodhej çezma me lavaman. Ndërkohë 4 (katër) prej dhomave ishin të pajisura me nga 1 (një) krevat, ndërsa 2 (dy) dhoma të tjerat kishin 2 (dy) krevate.

Të 4 dhomat e sigurisë të pajisura me nga një krevat, i plotësonin normat dhe parametrat teknik jetësor, për një person të arrestuar apo ndaluar, pasi sipërfaqja e përgjithshme ishte jo më pak se 10 m², e ndarë në ambient qëndrimi (dhomë) me sipërfaqe 6 m² dhe paradhomë me sipërfaqe 4 m².

Ndërsa dy dhomat të tjera për të arrestuarit/ndaluarit meshkuj madhorë, ndonëse ishin të ndara në ambient qëndrimi (dhomë) me sipërfaqe 6 m² dhe paradhomë me sipërfaqe 4 m², nuk plotësonin kriteret për sipërfaqen e nevojshme për jetesë për dy persona⁸.

Nga këqyrja e regjistrit për personat e ndaluar/arrestuar, ku evidentoheshin të gjitha rastet e ndalimeve dhe arrestimeve të kryera nga punonjësit e këtij organi, për periudhën 01.01.2025 deri me 04.07.2025, ishin evidentuar në këtë regjister 446 persona, nga të cilët saktësisht 433 shtetas madhorë burra, 3 shtetas të mitur dhe 10 shtetase gra të ndaluar/të arrestuar në konflikt me ligjin.

⁸ Kreu V, pika 3.3 e procedurave standarde “*Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre*”.

Referuar këqyrjes së këtij regjistri u evidentua se në disa raste ka pasur situatë të mbipopullimit apo rasteve të personave që flenë në tokë. Grupi i inspektimit konstatoi se në disa dhoma të sigurisë përveç dyshekut të vendosur në krevat, kishte dhe nga një dyshek tjetër, ku në rast të mbipopullimit personat flinin në dyshek të vendosur në tokë, duke përbërë trajtim jo dinjitoz të tyre⁹.

Dritaret e dhomave ishin me përmasa të tilla, që mundësonin futjen e sasisë së mjaftueshme të ajrit dhe dritës natyrale. Çdo dhomë ishte pajsur me orënditë e nevojshme për jetesë si krevat, dyshekë, batanije dhe jastëk, të cilat ishin në gjendje të mirë dhe të pastra.

Në ambientin e paradhomës është i instaluar një lavaman së bashku me rubinetin e ujit, si dhe tualeti i vendosur në dysheme. Përsa i përket ËC-së tek katër dhomat e sigurisë me një person mungonte muri rrethues prej betoni apo tulle të suvatuara në një lartësi 1 m nga sipërfaqja e dyshemesë, sikundër parashikuar në procedurat standarde “Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimin dhe zgjidhja e kërkesë/ankesave të tyre” të Urdhrit nr .1720, datë 20.11.2023 të Drejtorit të Përgjithshëm të Policisë së Shtetit, kreu VIII pika 4.3/b. Ndërsa në dy dhomat e tjera ËC konstatohet se ishin sipas procedurës standarde.

Këtë konstatim e ka evidentuar edhe CPT gjatë vizitës inspektuese në Shqipëri të zhvilluar në periudhën 4-15 maj 2023 në institucionet policore, në raportin dërguar autoriteteve të Qeverisë së Shqipërisë, përsa i përket kushtet në dhomat e sigurisë), ka konstatuar se: *“Tualetet në Komisariatin e Policisë Fier nuk kishin fare ndarje në kundërshtim me kërkesat e procedurave standarde”*¹⁰.

Përsa më sipër, CPT ka rekomanduar që autoritetet shqiptare të ndërmarrin hapat e nevojshëm në Komisariate, për të siguruar që tualetet brenda qelisë në qelitë me shumë persona të janë të ndara siç duhet nga pjesa tjetër e qelisë (mundësisht deri në tavan).

Në këtë komisarjat ishte krijuar ambient i posaçëm për larjen e trupit, ku ishte instaluar një dush, i cili ndodhej në mes të korridorit të dhomave të sigurisë. Të ndaluarit/arrestuarit kishin akses për larjen e trupit në një ambient të posaçëm (1 dush me ujë të ngrohtë). Dushi ishte funksional dhe punonte me sistem qendror, i cili ishte i pajisur me të gjitha pajisjet që shërbejnë për këtë qëllim.

Gjithashtu ambientet e sigurisë ishin të pajisura me kaldajë për ngrohjen në dimër, por konstatuam se **kaldaja kishte defekt dhe nuk punonte, pra në këtë komisarjat mungonte sistemi i ngrohjes**¹¹.

Në çdo dhomë kishte zile të emergjencës, e cila mundësonte komunikimin me shërbimin e policisë në moment nevojë. Në korridorin e ambientit të sigurisë kishte aparat telefonik fiks dhe

⁹ Normat dhe parametrat teknike, jetësore e të sigurisë së dhomave për një të arrestuar/ndaluar janë: *Sipërfaqe e përgjithshme jo më pak se 10 metër katror, e cila ndahet në ambient qëndrimi (dhoma) me sipërfaqe 6 m2 dhe paradhomë me sipërfaqe 4 m2. Lartësia e këtyre ambienteve është jo më pak se 2.5 m.*

¹⁰ Kreu VIII, pika 4/ e procedurave standarde “Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”.

¹¹ Kreu VIII, pika 3/c e procedurave standarde “Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”, ku parashikohet se: *“Kriteret për ndërtimin e dhomave të sigurisë nën dysheme vendosen të gjitha kabllot e tubat e instalimeve të ngrohjes, ato hidraulike dhe ato elektrike, të cilat të jenë të fshehura e të mbuluar me beton. Në rast se nuk është e mundur ngrohja nga dyshemeja, pajisjet për ngrohje të vendosen në paradhomë”.*

citofon për përdorim nga punonjësit e shërbimit në rastet e tentativave apo ngjarjeve të rënda me të ndaluarit/arrestuarit, për të kërkuar ndihmë dhe ndërhyrje të shpejtë. Ambienti i sigurisë kishte burim rezervë energjie me gjenerator më vete.

Grupi i inspektimit konstatoi se në këtë **komisariat nuk kishte dhomë mjeku**. Trajtimi shëndetësor për persona të ndaluar/arrestuar, kryhet nga mjeku që është i punësuar me kohë të pjesshme në organikën e Drejtorisë Vendore të Policisë Fier. Për trajtime shëndetësore më të specializuara, me rekomandimin e mjekut, personat e ndaluar/arrestuar shoqëroheshin menjëherë për në Qendrën Spitalore Rajonale Fierit. Numri i lartë i personave të shoqëruar/arrestuar tregon se ka nevojë të domosdoshme për mjek me kohë të plotë. Për vitin 2025 me statusin e arrestuar ishin 446 persona dhe ishin kryer nga mjeku 503 vizita mjekësore. **Edhe ky konstatim është i vazhdueshëm, ndaj mos reagimi ndaj kësaj çështjeje është i papranueshëm.**

Kryerja e vizitave mjekësore dhe evidentimi i tyre në kartelë dhe regjistrin përkatës të Komisarariatit të Policisë¹², janë detyrim ligjor për mjekun/ndihmësmjekun, por dhe për drejtuesit dhe punonjësit e policisë, pasi duhet të garantojnë shërbimin shëndetësor të nevojshëm ndaj këtyre personave, gjatë gjithë periudhës që ata ndodhen në mjediset e policisë.

Gjithashtu kjo problematikë është trajtuar në raport drejtuar Qeverisë Shqiptare mbi vizitën e CPT në Shqipëri të kryer në datat 4-15 maj 2023, i cili ka rekomanduar se: ***“Autoritetet shqiptare duhet të marrin masat e nevojshme për të siguruar që dispozitat e procedurave standarde që kanë të bëjnë me ekzaminimin fillestar mjekësor të personave të ndaluar të zbatohen me rigorozitet në praktikë”***.

Në ambientin e dhomave të sigurisë ndodhej një dhomë për takimin e të ndaluarve/arrestuarve me avokatët dhe pyetjen e tyre nga oficerët e policisë gjyqësore, e cila ishte e monitoruar me sistemin e kamerave. Kjo dhomë ishte e pajisur me tavolinë dhe karrige të fiksuara në dysheme.

Hyrja kryesore e ambientit të sigurisë, korridori i tij dhe hyrjet në dhomat e sigurisë monitoroheshin me kamera për 24 orë. Ndërkohë që të dhënat ruheshin në server për një periudhë dy javore.

Nga informacioni i dhënë nga punonjësit e policisë që shërbenin në dhomat e sigurisë dhe personat e arrestuar rezultoi se, të ndaluarit/arrestuarit trajtoheshin me ushqim 3 (tre) herë në ditë sipas normave për trajtimin me ushqim të përcaktuar në vendimin nr. 189, datë 15.03.2017 “Për trajtimin me ushqim të punonjësve, të studentëve dhe të kursantëve në institucionet arsimore të Policisë së Shtetit, si dhe të shtetasve të ndaluar dhe arrestuar deri në sqarimin e pozitës së tyre”. Ushqimi përgatitej nga një subjekt privat në bazë të kontratës së lidhur me të dhe ofrohej me shërbim catering.

Nga inspektimi i bërë dhe nga intervista me personat e arrestuar rezultoi se të ndaluarve/arrestuarve u jepen produkte për ruajtjen e higjienës vetjake dhe të ambientit, si sapun, detergjente, letra higjienike dhe letra për fshirjen e duarve dhe të fytyrës.

Në momentin e inspektimit, në dhomat e sigurisë kishte 8 persona të arrestuar. Në këtë komisariat për personat e arrestuar **nuk kishte ambiente për të dalë në ajrim** duke bërë që

¹² Kreu II, pika 7, e procedurave standarde “Rregullat teknike të shoqërimit në Policinë e Shtetit”.

këto kushte të mos ofrojnë trajtim dinjitoz të personave që kalojnë midis 48 orë në 4-5 ditë në këto ambiente.

Nga intervistat me personat e arrestuar/ndaluar, grupi i inspektimit konstatoi se, ata ishin trajtuar në mënyrë korrekte gjatë kohës së arrestimit/ndalimit për ekzekutimin e vendimit të gjykatës apo urdhrat të prokurorit, gjatë shoqërimit në mjedisin e DVP Fier, marrjes në pyetje nga specialistët/oficerët e policisë gjyqësore, si dhe gjatë qëndrimit në dhomat e sigurisë. Të intervistuarit nuk kishin pretendime për trajtim denigrues, jo human, apo për ushtrim të dhunës fizike e psikologjike ndaj tyre.

Regjistri i personave të shoqëruar, ndaluar/arrestuar dhe evidentimi i tyre

Në Komisariatit e Policisë Fier, u evidentua se zbatoheshin kërkesat e përcaktuara në ligjin nr .82/2024 “Për Policinë e Shtetit”, dhe procedurat standarde “*Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre*”, miratuar me Urdhrin e Drejtorit të Përgjithshëm të Policisë së Shtetit nr .1720, datë 20.11.2023, ku parashikohet se: “Çdo njësi policore që ka dhoma shoqërimi e sigurie, duhet të jetë e pajisur ndër të tjera, edhe me regjistrat përkatës”.

Gjatë inspektimit u konstatua se në Komisariatit e Policisë Fier, “Regjistri i evidentimit të të dhënave për personat e shoqëruar” ishte i tipit “Model nr.1” konform me procedurat standarde për rregullat teknike të shoqërimit në polici dhe ishte i sekretuar.

Të gjithë personat e shoqëruar në organin e policisë sipas dispozitave të ligjit nr . 82/2024 “Për Policinë e Shtetit”, regjistroheshin në këtë regjistrë nga punonjësit e zyrës së informacionit.

Nga këqyrja e këtij regjistri rezultoi se, koha e qëndrimit në gjendje shoqërimi e shtetasve ishte e ndryshme nga 1 orë deri në 5 orë në raste të veçanta. Rubrikat e regjistrat ishin plotësuar në mënyrë korrekte, me përgjegjësi dhe saktësi nga punonjësit e policisë¹³.

Në këtë komisarjat ishte vendosur regjistri për personat e ndaluar/arrestuar, ku evidentoheshin të gjitha rastet e ndalimeve dhe arrestimeve të kryera nga punonjësit e këtij organi, i cili ishte i sekretuar.

Nga këqyrja e këtij regjistri rezultoi se në rastet e arrestimeve dhe të ndalimeve të personave të shoqëruar, ora e arrestimit/ndalimit përputhej me orën që në momentin e shoqërimit të tyre për në mjediset e policisë.

Avokati i Popullit ka rekomanduar se në rastet kur për personat e shoqëruar në organet e policisë vendoset arrestimi apo ndalimi, në procesverbalin e arrestimit në flagrancë ose të ndalimit, duhet të vihet ora e mbikëqyrjes policore dhe jo ora e shoqërimit të tyre për në mjediset e policisë apo ora kur përpilohet procesverbali i arrestimit/ndalimit. Kjo merr më shumë vlerë pasi ky komisarjat shërben edhe si ambient sigurie për komisarjatet e tjera që nuk kanë dhoma të tilla.

Rekomandimet e Avokatit të Popullit janë bazuar jo vetëm në parimet universale të së drejtës dhe në parimet e përgjithshme të së drejtës tonë penale, por edhe në dispozitat konkrete të Kodit

¹³ Kreu VII, procedurat standarde “Rregullat teknike të shoqërimit në mjediset e Policisë së Shtetit”, miratuar me Urdhrin e Drejtorit të Përgjithshëm të Policisë së Shtetit nr.894, datë 19.07.2022.

të Procedurës Penale, respektivisht në nenet 144, 250 dhe 259 të tij, si dhe në nenin 19, pika 7 e ligjit nr . 82/2024 “Për Policinë e Shtetit”.

Në këtë Komisariat mbahet një regjistër për të miturit të shoqëruar në konflikt me ligjin ku evidentohen të gjithë rastet e të miturve të shoqëruar në këto ambiente, në të cilin u konstatua se të gjithë rubrikat e regjistrit ishin plotësuar në mënyrë korrekte dhe regjistri ishte i sekretuar. Nga këqyrja e këtij regjistri rezultoi se përgjatë vitit 2025 ishin të shoqëruar 3 të mitur në konflikt me ligjin¹⁴.

Në këtë komisariat kishte edhe regjistër për evidentimin e kërkesë/ankesave të personave të shoqëruar, të arrestuar dhe të ndaluar, sikurse parashikohet në nenin 24 të ligjit nr . 82/2024 “Për Policinë e Shtetit”, por gjatë vitit 2025 nuk ishte evidentuar asnjë ankesë apo kërkesë nga ana e këtyre personave.

Gjithashtu u evidentuan se mbaheshin edhe regjistër për takimet me avokatin ose prokurorin, regjistër të vizitave mjekësore, regjistër të shoqërimit të personave në ndaluar në gjykatë apo në institucione të tjera, regjistër të marrjes në pyetje nga prokurorët e çështjes, si dhe karta me të drejtat e personave të ndaluar ose të arrestuar në gjuhën shqipe dhe në 8 gjuhë të huaja, të cilat mbaheshin në dhomën e punës dhe administroheshin nga përgjegjësi i dhomave të sigurisë. Avokati Popullit thekson se plotësimi i regjistrave në kohe dhe me korrektësi është një standard thelbësor me funksion parandalues për të garantuar të drejtat e njeriut.

Ambientet e intervistimit

Në Komisarlatin e Policisë Fier, oficerët e policisë gjyqësore i kryenin veprimet procedurale me të shoqëruarit në mjediset e policisë, në zyrat e punës së tyre, për shkak të mungesës të ambienteve të veçanta për marrjen në pyetje/intervistimin e shtetasve të shoqëruar. Këto zyra, nuk ishin të monitoruara me sistemin e kamerave.

Lidhur me këtë fakt, Avokati i Popullit nisur edhe nga inspektimet e mëparshme ka rekomanduar marrjen e masave për ndërtimin e zyrave të dedikuara ku merren në pyetje shtetasit gjatë kryerjes së veprimeve procedurale nga oficerët e policisë gjyqësore dhe instalimin e sistemit të monitorimit me kamera pranë tyre, por është konstatuar se sërish ky rekomandim nuk është plotësuar¹⁵.

Procesi i monitorimit filmik gjatë marrjes në pyetje të personave të shoqëruar dhe të ndaluar është një element parësor për mbrojtjen e të drejtave dhe lirive të njeriut, pasi ka efekt parandalues për kryerjen e veprave të dhunshme dhe të dënueshme, si nga ana e të shoqëruarve, ndaluarve apo arrestuarve, ashtu dhe nga vetë punonjësit e policisë së shtetit. Kjo problematikë është evidentuar edhe në gjetjet e CPT -së në raport të drejtuar shtetit shqiptar.

Në raportin drejtuar Qeverisë Shqiptare mbi vizitën e CPT-së në Shqipëri të kryer në datat 4-15 maj 2023 është evidentuar qartë nevoja e krijimit të dhomave të intervistimit: “Në fakt, një

¹⁴ Detyrim i përcaktuar nga ligji nr.37/2017 “Kodi i Drejtësisë Penale për të Mitur”.

¹⁵ “Një sistem i monitorimit të vazhdueshëm i standarteve dhe procedurave të intervistave të policisë duhet vënë në zbatim, po ashtu; kjo kërkon një regjistrim të saktë të intervistave të personave në ambientet e policisë, të cilat, nëse është e mundur duhet të zhvillohen me pajisje regjistruuese elektronike (audio dhe/video). Duhet të kërkohet që të regjistrohet në mënyrë sistematike koha kur ka filluar dhe mbaruar intervista, ndonjë kërkesë të bërë nga i ndaluari gjatë intervistës, si dhe të personave të pranishëm gjatë çdo interviste.”

strukturë e tillë mund të sigurojë një regjistrim të plotë dhe autentik të procesit të intervistimit, duke lehtësuar në masë të madhe hetimin e çdo pretendimi për keqtrajtim. Ky fakt është në interes si të personave që janë keqtrajtuar nga policia, ashtu edhe të punonjësve të policisë që janë përballur me pretendime të pabaza se janë përfshirë në keqtrajtme fizike apo presione psikologjike.

Në parim, regjistrimi audio-vizual duhet të mbulojë të gjitha fazat e marrjes në pyetje nga policia, duke përfshirë dhënien e informacionit për të drejtat në fillim të intervistës. Kjo do të sigurojë që marrja në pyetje nga ana e policisë të kryhet në përputhje me ligjin dhe do të ndihmojë në parandalimin e çdo praktike të nënshtrimit të personave të ndaluar në marrje në pyetje joformale përpara marrjes në pyetje zyrtare.”

CPT inkurajon autoritetet shqiptare të zgjerojnë aplikimin e regjistrimit audio-vizual të intervistave të policisë për marrjen në pyetje të të gjithë personave të shoqëruar¹⁶.

Grupi i inspektimit, ka evidentuar si një praktikë të mirë në Komisaratin e Policisë Fier, investimin e realizuar me fonde nga “Save the Children”, për krijimin e tre dhomave të përshtatura për intervistimin, ashtu dhe për qëndrimin e të miturve të arrestuar/ndaluar apo të dën timer, të pajisura me orëditë e nevojshme dhe me kushte të përshtatshme bashkëkohore. Këto dhoma ndodheshin në katin e 1 të godinës së komisarimit dhe ishin bërë funksionale. Ato ishin të pajisura me të gjitha orëditë e nevojshme si tavolina, kolltukë, bibliotekë për libra, postera informues, si dhe ishte e monitoruar me sistemin audio - viziv.

Ndihma juridike, psikologjike dhe kujdesi mjekësor

Në komisaratin e Policisë Fier, punonjësit e policisë zbatonin detyrimin ligjor të parashikuar në nenin 19/5 dhe 25/5 të ligjit nr. 82/2024 “Për Policinë e Shtetit”, si dhe në kapitullin VII, pika a.3.4 e procedurës standarde “Rregullat për trajtimin e shtetasve që shoqërohen në mjediset e policisë”, për plotësimin dhe dhënien e procesverbalit të veprimeve të kryera me të shoqëruarit nga punonjësit e policisë, që ishin ngarkuar me detyrën e kryerjes së verifikimit dhe trajtimin e çështjes përkatëse.

Nga pyetja e punonjësve të policisë rezultoi se në rastet kur të ndaluarit/arrestuarit madhorë të cilët nuk kishin mundësi financiare për të pajtuar avokat privat kërkonin ndihmë juridike, atyre ju sigurohej mbrojtja me avokat të caktuar kryesisht.

Sipas informacionit, përgjithësisht avokati paraqitej në mjediset e policisë jo më vonë se 1 orë nga momenti i njoftimit nga personeli i shërbimit ose nga specialistët e policisë të ngarkuar për kryerjen e veprimeve procedurale me të shoqëruarin apo të arrestuarin e dyshuar për kryerjen e veprës penale. Në regjistrin ku evidentohen takimet e të arrestuarit me avokatin mbrojtës, shënohej emri dhe mbiemri i avokatit, si dhe ora e takimit, por jo ora e njoftimit.

Përgjatë inspektimit në Komisaratin e Policisë Fier, **u konstatua se nuk kishte një listë të afishuar në ambientet e komisarimit ku mund të evidentoheshin avokatët kryesisht**, Gjithashtu kjo problematikë është trajtuar në raport drejtuar Qeverisë Shqiptare mbi vizitën e CPT në Shqipëri të kryer në datat 4-15 maj 2023.

¹⁶ Electronic recording of police interview (Regjistrimi elektronik i marrjes në pyetje nga ana e policisë) fq.13, <https://rm.coe.int/1680ae233b>.

CPT-ja bën rekomandime të hartuara për të përmirësuar funksionimin në praktikë të masave mbrojtëse ligjore. Gjithashtu kërkohet veprim për të siguruar që të gjithë personat e ndaluar nga policia të jenë plotësisht të informuar për të drejtat e tyre që nga fillimi i heqjes së lirisë. CPT-ja gjatë vizitës në organet e Policisë së Shtetit ka konstatuar se: *“Ka pretendime se oficerët e policisë kishin pranuar kërkesat e personave të shoqëruar arrestuar/ndaluar për avokat kryesisht vetëm pas një vonese të konsiderueshme, në mënyrë që të mund t’i pyesnin ata në mënyrë joformale për veprën e dyshuar pa praninë e një avokati”*¹⁷.

Përgjatë inspektimit punonjësit e policisë i parashtruan grupit të inspektimit, se në rastet kur të ndaluarit/arrestuarit ishin të mitur, veprimet procedurale kryheshin në praninë e detyrueshme të avokatit mbrojtës të caktuar kryesisht dhe të psikologut.

Gjithashtu, u evidentua se në mjedisin e shoqërimit mungonte edhe lista e psikologëve e miratuar nga Urdhri i Psikologut në Tiranë. Pavarësisht kësaj, në rastet kur i shoqëruari apo i ndaluar/arrestuari ishte i mitur, psikologu sigurohej nga Drejtoria Vendore e Policisë Fier, por edhe në bashkëpunim me Bashkinë dhe Shkollën e Mesme të qytetit në Fier. **Mekanizmi Kombëtar kërkon që avokati dhe psikologu të jenë të pranishëm**, që në në momentin e hyrjes të të shoqëruarve në komisariat, për të garantuar njohuritë e tyre për të drejtat e tyre dhe mbështetje psikologjike në rrethanat në të cilat këta shtetas ndodhen në institucion.

Grupi i monitorimit konstatoi se, vizitat mjekësore nga ana e mjekut me kohe të pjesshme kryheshin brenda afatit 12 orë, nga momenti i vendosjes së këtyre personave në ambientin e sigurisë, sikurse përcaktohet në Urdhrin e Drejtorit të Përgjithshëm të Policisë së Shtetit nr .1720, datë 20.11.2023, për miratimin e procedurave standarde *“Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”*¹⁸.

Vizitat mjekësore ndaj të ndaluarve/arrestuarve, konstatimet dhe mjekimet e dhëna pasqyroheshin në regjistrin e vizitave mjekësore. Në regjistrin e mjekut ishin të evidentuara të gjitha të dhënat e konstatuara përgjatë vizitës mjekësore të personave të arrestuar.

Gjatë inspektimit u konstatua se në korridoret e mjedisit të dhomave të sigurisë të komisariatit, ishin të afishuara postera me të drejtat ligjore të personave të shoqëruar në organin e policisë dhe të personave të ndaluar/arrestuar.

Për sa më sipër dhe me qëllim zgjidhjen e problemeve të konstatuara gjatë këtij inspektimi, bazuar në pikën 3 të nenit 63 të Kushtetutës ku parashikohet se: *“Avokati i Popullit ka të drejtë të bëjë rekomandime dhe të propozojë masa kur vëren shkelje të të drejtave dhe lirive të njeriut nga administrata publike”* dhe në bazë të nenit 21/b të ligjit nr . 8454, datë 04.02.1999 *“Për Avokatin e Popullit”*, i ndryshuar, ku përcaktohet se: *“Avokati i Popullit paraqet rekomandime për vënien në vend të së drejtës së shkelur tek organi administrativ, që, sipas tij ka shkaktuar shkelje të të drejtave dhe lirive”*,

REKOMANDOJMË:

¹⁷ <https://rm.coe.int/1680ae233b>, fq nr.3, raport drejtuar Qeverisë Shqiptare mbi vizitën e KPT në Shqipëri të kryer në datat 4-15 maj 2023.

¹⁸ Kreu V, pika 7.2 e procedurave standarde *“Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”*.

1. Marrjen e masave të menjëhershme, për gjetjen e fondeve për riparimin e dritareve të dhomave të shoqërimit në Komisaratin e Policisë Fier, sipas kritereve të parashikuara në Kreun VI, pika 4 të procedurave standarde *“Rregullat për trajtimin e shtetasve që shoqërohen në mjediset e policisë”*, miratuar me Urdhrin nr. 894, datë 19.07.2022 të Drejtorit të Përgjithshëm të Policisë së Shtetit.
2. Marrjen e masave të nevojshme për ndërtimin e murit rrethues të tualeteve në dhomat e sigurisë sipas parashikimeve kreu VIII pika 4.3/b, në Urdhrin e Drejtorit të Përgjithshëm të Policisë së Shtetit nr .1720, datë 20.11.2023, për miratimin e procedurave standarde *Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”*.
3. Marrjen e masave për parashikimin e kapaciteteve të dhomave të sigurisë në Drejtorinë Vendore të Policisë Fier, sipas parashikimeve të standardeve të hapësirës, si dhe miratimin me urdhër nga Drejtoria e Përgjithshme e Policisë së Shtetit.
4. Marrjen e masave për vendosjen e tavolinave në dhomat e shoqërimit sipas parashikimeve në Urdhrin e Drejtorit të Përgjithshëm të Policisë së Shtetit nr .894, datë 19.07.2022, për miratimin e procedurave standarde *“Rregullat për trajtimin e shtetasve që shoqërohen në mjediset e policisë”*.
5. Marrjen e masave të menjëhershme, për instalimin e sistemit të monitorimit me kamera vëzhguese në ambientet dhe brenda dhomave të shoqërimit në Komisaratin e Policisë Fier.
6. Marrjen e masave të menjëhershme, për krijimin e një ambienti të përshtatshëm për intervistimin/marrjen në pyetje të shtetasve, gjatë kryerjes së veprimeve procedurale nga specialistët dhe punonjësit e policisë në këtë institucion, si dhe të ndërpritet praktika e marrjes në pyetje të personave të shoqëruar në zyrat e punës të punonjësve të policisë të komisarariatit.
7. Marrjen e masave për emërimin e mjekut me kohë të plotë në Drejtorinë Vendore të Policisë Fier, për kryerjen e vizitave mjekësore të personave të arrestuar/ndaluar, brenda 12 orëve të vendosjes të këtyre personave në ambientin e sigurisë.
8. Marrjen e masave për krijimin e ambienteve të ajrimit për personat në dhomat e sigurisë në Drejtorinë Vendore të Policisë Fier.
9. Marrjen e masave për vënien në funksion të kaldajës për mundësimin e ngrohjes të personave të arrestuar, për periudhën e dimrit në ambientin e dhomave të sigurisë në këtë komisariat.
10. Marrjen e masave të menjëhershme, për afishimin në ambientet e dhomave të shoqërimit, të listës të përditësuar me avokatë mbrojtës të miratuar nga Dhoma Kombëtare e Avokatisë dhe organi i prokurorisë, me qëllim sigurimin e avokatëve kryesisht që nga momenti i privimit të lirisë të personit, në rastin kur i shoqëruari/ndaluari/arrestuari nuk ka mundësi financiare.

11. Marrjen e masave të nevojshme, për afishimin ne ambientin e shoqërimit dhe në zyrën e informacionit të komisariatit, të listës së psikologëve të miratuar nga Urdhri i Psikologut, Tiranë.
12. Marrjen e masave të menjëhershme, për dhënien e kartës së të drejtave në formë shkresore personave të shoqëruar apo ndaluar që në momentin e hyrjes së tyre në komisariat.
13. Marrjen e masave për trajnimin e punonjësve të policisë që janë përgjegjës për persona të shoqëruar, ndaluar/arrestuar në konflikt me ligjin si dhe njohja me Urdhrin e Drejtorit të Përgjithshëm të Policisë së Shtetit nr .1720, datë 20.11.2023 për miratimin e procedurave standarde *“Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”*, si dhe urdhrin nr .894, datë 19.07.2022 për miratimin e procedurave standarde të punës *“Rregullat për trajtimin e shtetasve që shoqërohen në Mjedise e Policisë”* .

Duke besuar në mirëkuptimin dhe bashkëpunimin tuaj,

**KOMISIONERI
i Mekanizmit Kombëtar
për Parandalimin e Torturës
(MKPT)**

Ahmet PRENÇI

dv